

嘉慶松江府志

松江府志卷四十三

名宦傳

國朝

楊之易應山人明都御史漣子順治二年授松江同知
四年提督吳勝兆謀逆之易不從被殺康熙間奉

旨贈卹推官方重朗亦同時遇害

通志

陳鑑字子明莆田人明歲貢順治二年薦授華亭知縣
旋棄官去卒於郡城其祭陳子龍頭顧入獄文云緬予
友公始於燕京再於餘杭重公品行愛公文章王李之
後大雅洋洋天喪斯文餘子孰匡一腔熱血三載孔艱

目猶直視髮且上干義形於面忠溢於顏漢之北海宋

之文山耶鑑此文亦足附忠裕以不朽云

松江詩鈔

吳守祖奉天人順治三年授金山營參將時賊號白腰
黨者聚衆劫掠守祖沈謀獨斷引軍殲滅之嘗巡哨至
獨山海中見紅燈二彎弓射之潛滅夜半水忽溢及半
山明日視之有龍浮水出二燈乃其目也守祖神色終
始不渝民戴其德鎔鐵肖象於錢武肅王祠

金山志

魏球字鳴玉建安人順治五年舉人除知遷江縣康熙
六年調補青浦廉以律身慈以待下謙以接士大夫居
年餘建文昌書院兵燹後卓錫縣志散佚不全聘縣人

諸嗣郢等重爲編輯尋以催科不力罷官民築青山棠

院迎居焉

青浦志

唐瑾字雪靈光州人順治三年進士初知嘉定縣請減本邑折漕銀二萬餘憂歸八年起補青浦知縣亦以惠

政傳

青浦志

秦世楨字瑞賓奉天廣寧人隸正藍旗漢軍以貢生除文安知縣行取考選四川道監察御史巡按浙江部議降調疏辯復原官巡視北城順治八年奉

命巡按江南時常兵燹之後田畝界址混淆者多世楨令里長編列魚鱗冊贏縮胥復其舊荒坍竝區別之又前

此州縣徵賦民有逾額輸納者世楨限夏稅五月秋糧九月先給易知單示以科則定數又每甲彙列賦額及輸戶爲滾單使里長按戶遞傳旣輸則填注之違則送縣追比先行之蘇州人以爲便遂條列以

聞通行諸郡又以徵銀設櫃之制有司奉行不實請增司府印封日收簿亦鈐司府印輸戶自封投櫃驗數書之簿別予印單執之將啓櫃封先申牒院司候稽核復請革僉點民兌漕之例改爲官兌官收又漕卒驕橫每米一石索加銀二三錢世楨立五米五銀法官爲給之竝下部議著爲令他如懲革蠹役請

敕督撫司道及府廳州縣毋於經制外濫設胥役一人竝
定以年限勿容久充

上是其言如所請還京遷大理寺丞授浙江巡撫調操江
部議以舟山失陷未卽恢復革職卒於家

本傳

李來泰字石臺臨川人順治九年進士授工部虞衡司
主事出督江南學政尋督理蘇松糧儲復分守蘇松常
道歷官勤慎皆有政績會裁缺歸里康熙十七年以博
學宏詞徵明年擢翰林院侍講

通志參江
西通志

韓理字長公淄川人順治六年進士授松江府推官旋
攝府篆粹有海警理多設方略城賴以安邑人立石記

其功

山東通志

李正華字茂先獻縣人拔貢順治十年由兗州運河同知遷松江知府精明強幹姦弊一清郡東南蔣莊有劇盜爲民患其黨曰衆自丞尉至督撫左右莫不與相首尾正華偕同知崔宗泰往偵之不半月渠魁就縛而上游文移踵至令械赴省正法正華謂推官韓理曰是出盜謀往必縱縱則不能復制矣引羣盜至前訊服立斃杖下華亭令編審甲長多私徇以貧廢充正華易以應充之戶書榜令縣取印來印之弊遂絕又有奸民欲謀陷其怨家造叛逆籍竄名其中首於府正華反覆詰之

得其情火而杖遣之提督馬進寶威悍莫與抗獨心憚
正華去之日兒童婦女競以束蔬尺布投其舟幾滿

通志

參魯志稿

閻紹慶字康侯魯山人順治十年以拔貢知上海縣有
大臺孫年里魁顧酉暴橫爲民患紹慶廉得其實立置
之法徵輸遇大寒暑不筭一人而賦辦十二年海寇犯
境鎮弁王璟緣爲亂謀劫倉庫紹慶抵死拒之事定有
誣縣民通寇紹慶詣臺使力保全活甚衆後以法論土
豪於死羣小交構坐免著海邦讞略一百六十條時有

丞陳洪範濬薛家浜滌污清占頗有功

容菴筆記

王之鼎字公定漢軍正紅旗人順治七年襲二等子爵晉一等擊走孫可望軍論功最授副都統康熙元年授福建中路總兵再敘克復功晉三等伯爵十年授江南提督時故帥沒士卒因歲饑不受繩束民間惴惴恐禍起旦夕之鼎至下令將領歸營甲士歸伍按籍傳呼頃刻卽至五日一集校技藝等賞罰無一人敢譁者終三歲民不知有兵尋拜鎮海將軍駐防京口上疏言黃浦水汛外通大海內達蘇松更有沿海馬道下抵杭州上接京口請撥崇明沙船七十令八旗及綠旗官兵駐黃浦操防遇賊船飄突水則舟師整備以扼要隘陸則馬

道飛馳其圖撲勦亦防禦之一法得

旨俞允調福建水師提督加定海將軍改授四川提督賊陷瀘州犯永寧之鼎拒守月餘外援阻絕知事不可爲手解印付僕趨赴成都被執罵賊不屈遇害事

聞議卹贈太子少保廕一子四品官

賜祭葬諡忠毅四十六年

聖祖仁皇帝南巡幸松江

御書純忠遺愛額

賜其祠

本傳參墓志

商顯仁字晦侯淳安人順治十二年進士授上海知縣

縣故巖邑宿逋積三十萬新舊竝徵民力益不支顯仁
申明賞罰置酒陳鼓樂於庭輸及額者勞之酒出復以
鼓樂前導民觀感相戒勿逋賦暇則進諸生角藝品題
高下十不一爽尋以科場事株逮按鞫無狀繫獄歲餘
卒不免士論寃之

上海志

楊捷字元凱其先世居寶應以世襲指揮家遼左爲義
州人順治元年授山西撫標遊擊破苛嵐土賊擢副將
大兵既定廣東

詔捷率宣大兵移鎮次池州江西總兵金聲桓廣東總兵
李成棟相繼叛授捷九江總兵官復都昌予雲騎尉世

職克潮州加左都督擢江西提督會鄭成功突陷鎮江
窺江寧

特加捷太子少保駐揚州防江北要汛調山東提督緝土
賊于七黨五十餘人十二年調江南提督海賊鄭錦犯
乍浦捷遣參將白可愛等往剿獲其船俘斬無算錦旋
犯漳州陷海澄

上以捷謀勇兼優調福建提督兼管水陸晉少保兼太子
太保竝諭捷攜綠旗兵之願往者捷因疏言臣自任江
南提督召募材健訓練有年堪資戰守擬選二千名竝
擇遊擊守備數員以備任用

上允之隨平泉州授爲昭武將軍管福建陸路提督事金門厦門悉平駐泉州以老疾求罷

命仍任江南提督敘恢復海澄功晉世職三等輕車都尉準襲四次捷駐松江年久以病乞休者再奉

溫旨慰留二十九年卒於官年七十四贈太傅諡敏壯孫

鑄襲職

賜籍江都

江都志
參本傳

宮家璧奉天前屯衛人拔貢順治十四年擢分巡蘇松道裁決明敏案無留牘

通志

梁化鳳字獅天長安人順治三年武進士授山西高山

衛守備屢以破賊功陞大同掌印都司加都督僉事歷遷松江總兵十七年擢蘇松提督加太子太保左都督化鳳疏言蘇松濱海要地延袤八百餘里原設標兵僅二千餘名請酌調省兵三千八百名立爲中左右前後城守六營以資捍禦下部議行十八年

詔追敘擊敗江寧海寇繼援崇明功加授世職晉爵三等男準襲八次會裁江安廬鳳提督缺以化鳳爲江南全省提督朝議欲立界遷沿海居民於內地化鳳曰以所棄地畝計之當缺賦額若干如以此益兵添設營制則國旣足兵民無廢業江南沿海設兵規自化鳳魚鹽耕鑿

民到於今受其賜焉康熙十年卒於官

賜祭葬贈少保諡敏壯孫作長襲爵次子鼐廕生後改武

職授提標左營遊擊歷遷蘇松水師總兵提督同知至

浙閩總督

本傳參
西安志

韓世琦滿洲正紅旗人由吏部主事遷宗人府啓心郎
康熙元年授順天巡撫調江寧巡撫疏報二年江寧五
府錢糧全完

優敘加工部侍郎銜又以捐修松江府城垣全完三四兩
年錢糧晉尚書又疏蘇松常鎮四府每歲兌糧所存耗
米請折銀充餉下部議行御史楊維禡等疏劾之議削

加級尋起偏沅巡撫調四川巡撫

本傳

李復興字瑩斗濱州人順治三年舉人明年會試副榜康熙三年知婁縣以賦紂劾罷時郡苦編審婁爲甚復興候勘經年慘動心目因博詢父老知昔之編審爲定役今之編審爲賣役當編審之期縣書保長惟其所欲求免至賣妻鬻子不悔一經承役妻無可賣子無可鬻矣縣令席未暖輒被參罰亦坐此耳復興惻然思救其弊踰年復原官乃與舉人吳欽章諸生莊徵麒縣胥馬天麒等日夜討論定均田均役法三閱月歲事請於上官罷總甲塘長諸名目不假追呼而輸將恐後知府張

羽明推其法於所屬官民交便會以河工議奪職民額制府乞留不得八年三月卒於婁布政使慕天顏疏請永遠遵行而松人士復於白龍潭之南建祠院附以欽章等春秋致祀又梓其始末爲均役成書

魯志稿參均役成書

任辰旦字千之蕭山人順治十三年進士康熙六年除上海知縣清苦自厲敏於聽斷月必書所行事告城隍神有安西賈失金三百繫逆旅主人辰旦疑之禱於神役夢婦人右纏細女左手挈衣授之及視則裙襴也醒以告辰旦曰授衣非衣其字爲裴細女愛也得毋有裴姓而愛名者乎攝鞠得實其建吳松閘也故事修閘必

築壩竭水費不貲辰旦募浙匠仿浙地爲梁法度基廣
狹約丈尺伐石識甲乙使善泅者下之水卽故址疊石
爲門廣左右護隄束水就開十月而工成民不病役上
海沒水田六千餘畝賦額未除輸者輒破家前官履勘
虛實貿亂布政募天顏請

旨覆勘辰旦喜曰是吾志也日往來泥沙中蓬首垢足按
魚鱗舊冊釐其荒者閱二月費皆自辦俸不足出銀釧
棉布鬻之籍上得減除額征有差十八年舉博學宏詞
放還故官復以良吏薦入爲工科給事中論事切直改
大理寺丞丁母憂歸以前廷推事誥誤落職老於家

林

居集參
上海志

陳國祝字如南漢陽人康熙六年進士授青浦令有循

聲卓異陞兵馬司指揮

湖廣通志

郭廷弼漢軍鑲白旗人貢生順治十七年擢知松江府

居官勤政小大之獄務得其情尤究心農田學校諸大

端在任四載百廢具修郡志當崇禎時知府方岳貢屬

陳繼儒纂修意在援引賅博卷袞浩繁不無踳駁廷弼

禮聘郡人宋徵輿等悉心釐訂足稱簡要

華志稿

麻勒吉滿洲正黃旗人姓瓜爾佳氏順治八年繙譯舉

人明年會試第一

殿試一甲一名授修撰歷遷祕書院學士刑部侍郎康熙
七年授江南江西總督時蘇松頻遭水患布政使慕大
顏議濬劉河淤道二十九里濬吳松江使復舊規建閘
以時蓄洩麻勒吉與巡撫瑪祐疏請以漕折銀十四萬
兩充費得

旨俞允計典左遷兵部督捕理事官終提督九門步軍統
領

本傳參
舊通志

朱光輝字闇公奉天義州人康熙七年以廕生授上海
知縣年少有吏才不倚勢不作威邑人肖象於仁壽祠
至今猶稱小朱知縣又有陳迪者當塗人順治八年舉

人康熙四年上海教諭修尊經閣名宦鄉賢祠

上海志

瑪祐字篤周滿洲鑲紅旗人順治九年繙譯進士充王府教習歷欽天監監正康熙八年擢江蘇巡撫蘇松額賦之重由明初張士誠竊據其地久攻始克遷怒於民取豪戶租冊付有司定稅較宋多至七倍元三倍祐奏分官侵吏蝕民欠酌減浮糧二百餘萬又允布政慕天顏議以蘇松頻遭水患請以漕折銀十四萬兩充費濬劉河吳松江以時蓄洩卒於官下部議卹

賜祭葬諡清恪

本傳

周肇字子俶太倉人十歲能文章同里張溥舉復社聲

氣傾海內肇以總角稱高弟王撰王昊等號婁東十子
肇復爲之冠貢入太學順治十五年順天舉人康熙十
一年除青浦教諭振興學校舉卓異擢新淦知縣病卒

青浦志

尚元調字燮臣山陽人康熙十一年舉人授華亭教諭
性嚴正奉檄修葺學宮謀復侵占案射圃故址築垣爲
界并出積俸三百規復西南餘地爲營卒據已久誣
以擅奪營房訟之帥府元調赴愬卒噪甚逐之歸乃縊
於明倫堂士林痛惜之爲哀其教士事實請祀於

朝山陽縣志

方國棟字千霄直隸大興人康熙八年舉人由教諭累遷寧武兵備參議十二年改分守蘇松常道值

王師有事閩粵羽書旁午芻蕘糗糧之需猝不及辦有司皆惴恐國棟具成算從容指揮咸中肯綮軍興賴以無乏而民間晏然若不知有兵者初耿逆奉

命撤回三郡聚舟三千餘艘泊吳門備更替日久飢困國棟偵察情形無遷徙意縱遣之歡聲如雷已果以叛聞人服其膽識生平清慎自矢撫士民藹然有恩義以勞邁疾卒於官喪行老稚遮道號呼拜送數十里不絕翁

續稿參

魯志稿

慕天顏字鶴鳴靜寧人順治十二年進士授錢塘知縣
歷遷江南布政使康熙十五年擢江蘇巡撫天顏念民
困在賦與役而江南賦甲天下請減請蠲請緩罹水旱
力請賑卹往往不待報而以便宜發粟全活數百萬役
法久壞天顏均役以便民事簡費輕減往時十之五會
滇黔閩廣相繼煽亂

王師四出舳艫蔽大江而下所需夫役牽挽動以千萬計
天顏調護多方全活無算而調發煩數民猶不勝其苦
乃疏於

朝緊急軍機給緯夫餘給直船戶令雇水手夫賴以罷濬

吳松白茅等河以寓賑建牐蓄洩以利農田實惠在民
至今猶食其德先是天顏督造烏船濟師從優議敘加
太子少師兵部尚書後以奏銷浮冒降調尋起湖廣巡
撫調貴州擢漕運總督又爲御史郭琇等交章劾罷卒

年七十有三

本傳參有
懷堂集

魯超字文遠會稽人順治十七年副貢尚可喜入覲超
爲書疏

召見

賜翰林院庶吉士後改中書出爲蘇州同知康熙十五年
擢知松江府事上接下無不曲盡禮法尤喜造就人才

建扶風書院與教授陸在新舉行七篇會又延華亭林子卿等續纂郡志成書二十卷補修前所遺闕惜未版行守郡九載舉卓異者再巡撫湯文正斌薦廉能第一遷淮揚道副使至布政司使

遂初堂集參
松江詩鈔

劉廷諫漢軍正黃旗人康熙十五年知青浦縣時值兵興又當旱潦後廷諫悉心撫字遇事立辦賦額不缺而閭閻無追呼聲訟者片言折之猶慮風俗奢僭衣布食蔬示以廉儉會當遷上官知民不能釋留之令清田畝民喜其復來爲建清田公署

青浦志

南夢班字霽岑蘄水人康熙十六年授華亭知縣貌寢

材甚優縣有富人韓某控其子不孝其子賂旁郡某紳千金致書夢班備言子孝及庭鞠父以實告子如某紳言夢班佯怒其父將責之忽顧謂子曰汝孝父受杖忍乎盡代以完汝孝痛懲之幾斃杖下在任數載急軍餉清逋額飭保甲弭盜源尤爲能盡厥職

華亭志

史彬天津衛人康熙十六年授婁縣知縣時均田均役初行藉以中飽者頗言未便思所以變更之賴彬力持其說事乃定婁上中下三鄉有糧田折田之分折又有四五錢不耗斥鹵之別吏緣爲奸彬爲設丁產冊某名下注入某田某課無濫徵又設區里簿令納戶完糧卽

填注執串歸農三年中省刑恤訟崇文教勤振卹禁火
耗革濫差民愛之如父母有一輪明月萬里清風之頌
婁縣志

史彩字簡庵會稽人康熙二十年知上海縣修學宮建
常平倉葺獄舍置義冢縣志久失修延葉忠節映榴及
邑中士重爲釐訂明年海寇突犯縣境守備司起龍督
兵出戰彩亦率衆力禦巡撫洪之傑顏其堂曰海邦良
吏上海志

于成龍字北溟山西永寧人順治十八年副貢授羅城
知縣歷遷直隸巡撫所至以廉明著聞康熙二十一年

授江南江西總督貪墨吏望風解綬豪猾遷徙境外奢
侈僭踰者亦皆斂戢杜苞苴禁加派減火耗嚴保甲清
營伍除蠹胥釐關政平鹽價凡有關

國計民瘼者次第舉行二十三年兼署江蘇安徽巡撫卒
於官年六十有八

諭部予卹祭葬如典禮諡清端卒之日鰥童耄叟皆入弔
哭周身之具麤布一衾而已十一月

上南巡至江南回鑾

諭大學士等曰于成龍居官清正實天下廉吏第一應從
優褒卹爲大小臣工勸廷議加太子太保廕一子入監雍

正十年入祀賢良祠子準康熙二十五年以廕授山東
臨清州知州歷遷貴州巡撫四十五年調江蘇巡撫江
寧蘇州等處秋旱米貴請支藩庫銀十萬兩赴湖廣買
米平糶又疏豁除上元江寧句容江浦六合嘉定華亭
婁縣上海丹陽通州江都儀徵泰興十五州縣太倉鎮
海二衛濱海臨江潮汐衝擊坍田錢糧并沿江海田坍
漲不一照蘆課例五年一丈分別陞除得

旨俞允總督噶禮劾布政使宜思恭貪婪以準近在同城
不糾劾革職雍正三年

恩復原銜

本傳參
通志

趙崙字閻仙萊陽人順治十五年進士歷太常少卿康熙二十一年任江南學道松江自奏銷註誤裁減科舉及童子試額得者多倚恃勢力單門寒畯不得與崙屏絕苞苴禁止竿牘歲科取士類皆孤仄郡學諸生感崙德作爲歌詩頌揚休美知府魯超作序梓之

松江詩鈔

陸在新字蔚文長洲人康熙五年

詔以策論取士在新故以經濟自豪遂得舉二十一年授松江府教授教諸生以質行爲先其以金摯者卻之用不足知府魯超時分俸助之湯文正斌爲巡撫察其廉勤以卓異薦是歲江南七府一州諸長吏被薦者獨在

新一人遷廬陵知縣單車就道始至誓於城隍神不以
一錢自汙建問苦亭於衙西朔望坐亭中訪求民隱以
前官虧帑盈萬奏銷無所抵憂甚遂得咯血疾卒於官
子鸞書以斂之

二林
居集

司起龍山西人黃浦營守備康熙二十一年海寇乘潮
駕四舟突入境剽掠而去起龍已就寢亟披衣起率千
總陳聖策等躍入漁舟追之賊舟揚帆行甚迅抽矢射
其篷索帆落追及射賊應弦而斃者四人復奮擊之中
礮歿於陳昭武將軍楊捷馭賊首祭之聞於

朝敘死事功贈卹

通志參
上海志

湯斌字孔伯睢州人順治九年進士由庶吉士授翰林院檢討出爲陝西潼關兵備道調江西嶺北道康熙十七年

詔舉博學宏詞以魏象樞薦

召試一等授翰林院侍講二十三年擢內閣學士補授江蘇巡撫加意化導力挽頽風疏言蘇松等府賦額繁重康熙十八年以來積逋請於二十四年起分年帶徵俾官無挪新補舊之弊民無廢棄農桑之苦又言行取定例必錢糧胥完而蘇松二府賦重役繁甲於天下銓選得此輒謂遷擢難期頽然自放或竟罔顧官箴臣受任

巡撫首以察吏安民爲念凡守令爭自濯磨操守廉潔政績表著實不乏人然錢漕則萬萬不能十分全完蓋勢處其難智勇俱困今若拘成例勢必將僻壤小邑易於藏拙者塞責未足以光鉅典又言吳中風俗尚氣節重文章而佻巧者每作淫詞豔曲壞人心術蚩愚之民斂財聚會迎神賽社一旛之直至數百金婦女有遊冶之習靚妝豔服連袂寺院無賴少年學習拳勇輕生好鬪名爲打降臣嚴加訓飭委曲告誡一年以來寺院無婦女之遊迎神罷會豔曲絕編打降斂跡惟妖邪巫覡習爲怪誕之說愚民爲其所惑牢不可破凡少年婦女

有寒熱症者巫覡輒曰五通神將娶爲婦病者神魂失據往往羸瘵而死每歲常至數十家視河伯娶婦爲更甚臣多方嚴禁收其妖像木偶付之烈炬土偶投之深淵檄飭有司類此者盡撤毀之其材備修學宮葺城垣之用民始而駭以爲從前曾有官長銳意革除旋即遇祟而死皆爲臣危之數月之後見無他異始大悟往日之非然吳中巫覡最黠且悍恐臣去任後又造怪誕之說箕斂銀財更議興復請

賜特旨嚴禁勒石山巔庶可永絕根株皆得

旨如所請

特授禮部尚書管詹事府事改工部尚書卒年六十一下部議卹部臣以斌曾降七級奏奉

特旨如尚書例

予祭葬雍正十年

詔入賢良祠乾隆元年

賜諡文正所著有洛學編潛庵語錄詩文集

本傳

趙寧字管亭浙江人康熙二十七年由知縣擢松江知府民愛戴如召父杜母然性耿直失上官指罷去三十五年噶爾丹拒

命

聖祖仁皇帝親統六師征之寧請從轉餉出塞直抵二十
二臺凱旋敘功復原官尋以老退不復出

張庚字漢西惠來人康熙十一年舉人二十七年除青
浦知縣修學宮復尊經閣縣多姦吏挾制長官庚繩以
法使不得逞民間疾苦無隱不達年餘罷去府倅某奉
檄來署篆民填塞城闔不得出庚令家人間道縫印城
外予倅民復築惠來書院居之士人載酒論文村童野
叟饋菜粟習以爲常二年以病卒子貞元幼妾徐撫之
二十一年以節稱先是庚去青浦崑山徐元文方秉國歲
除召賓客置酒合樂客有述庚事者歎曰旁縣有賢令

而不能知至廢黜元文之過也竟爲之罷酒

青浦志

宋犖字牧仲商邱人順治四年列侍衛注銓通判康熙三年授黃州通判歷遷至江蘇布政使明年擢江西巡撫三十一年調江蘇巡撫嚴飭官方禁革火耗私派各郡漕米雖官收官兌而收書作奸於額編五米五銀外每石勒扣耗米三五升七八升勒收費銀三五分不等犖嚴加釐剔斥無名之羨以身先之宿弊一清又蘇松常三府白糧舊例另棧徵收最爲民病犖檄令隨漕併收勒石永著爲例青浦知縣持往年私刊議單妄行申稟嚴駁聽劾各屬知法在必行皆畫一遵守又飭行錢

糧截票之法以花戶額銀劃爲十分每月完一分完則截票歸農民尤稱便先後疏報蘇松沿海水溢被淹江寧松江鎮江山水陡發被淹撫綏蠲免活人甚衆陞吏部尚書以老致仕五十二年入京祝

萬壽

詔加太子少師卒於家年八十遺疏至下部議卹

賜祭葬如例著有西陂類稿

本傳參年譜

龔嶸字岱生號澹菴閩縣人貢生康熙三十一年知松江府事性行慷慨勤於撫字三十二年郡大旱竭誠步禱應時雨注以催科不力干吏議士民乞留督撫交章

入告得

旨俞允郡人范纘有詩紀其事先是知餘杭縣新文廟修
邑志濬南湖設醫局數年之間百廢具舉民立祠祀之

四香樓詩鈔
參餘杭縣志

荀鴻儒成都人康熙四十年以舉人知華亭縣居官清
廉一介不取去任無以具行李僑寓集仙街惟老僕自
隨僕死躬爨汲見者不知其爲故令云

華亭志

李發枝字鹿友浙江山陰人康熙三十九年進士四十
一年除上海知縣上海賊粟冠松江而戶版多瘦名徵
發則不知誰某俗又慎枝小則交捽大卽刀槩相摩發

枝至先教後威歲餘一切衰止一日坐堂皇傳海寇至
居民波迸發枝益治文書自如曰海舟胥買胡耳行遣
之矣尋遂安堵

聖祖仁皇帝巡幸松江需挽卒五千人發枝先事與直傭
約日待發呼則麋至無錯立亂行者以是擬治行最而
制府勿之喜會有他嫌劾罷去後起知深州逆大吏指

左遷臨海教諭歸卒於家

集虛齋集

許昭來石屏人康熙二十九年舉人四十五年知青浦
縣下車振文教懲姦宄民彫敝務爲噢咻之三月有上
官臨縣索錘數千意猶未厭昭來惋憤引疾去士民高

之圖其象於學宮復繪九峯三泖城西水驛之景父老子弟流連攀戀之狀系以詩爲浦上題襟集

青浦志

許士貞字介庵虞城人康熙十七年舉人四十五年知上海縣廉潔清正獄無冤抑歲大饑捐俸設粥廠法詳

恩普民詠甘棠

上海志

洪亮采字揆庵畢節人康熙三十五年舉人五十二年授青浦知縣謹身節用惻惻無華生平以勤民厲操恤裁崇學四事自助與諸生相見索其文存諸篋衍曰他日歸讀君文如見若面在任四載以憂去亮采習青烏家言以南水關闕大改而隘之後登瀛橋市販日集以

爲其術驗云

青浦志

穆廷枏臨榆人康熙六年武進士由蔚州路守備保舉
洊陞蘇松水師總兵官五十三年擢江南提督整飭營
伍和輯兵民廉潔自持實心盡職調福建陸路提督卒

賜祭葬如例諡清恪

本傳

陳鵬年字北溟湘潭人康熙三十年進士授西安知縣
河道總督張鵬翮請試河工題補天津同知引

見改知山陽縣旋擢江寧知府松江捕盜卒教令盜誣富
人爲黨掠其家逼婦女自經死旣成讞遇赦冀得脫鵬
年會訊白大吏曰誣良民爲盜卽盜也況又劫殺無赦

理置五人於法以江南河牘事被議落職後厯官至總督河道兼攝漕運督理武陟決口往來風雪中卒廕一

子諡恪勤

二林居集

郭嗣齡字引年江都人康熙五十四年進士授松江府教授潔已課士爲一時廣文最雍正元年同考浙江鄉闈以病歸嗣齡生平講程朱學所著神化性命通一無二論士林傳之其傳記序說亦有古法學者稱爲述堂

先生

江都志

常鮮滿洲正白旗人姓赫舍哩氏由筆帖式考授內閣中書厯遷內閣學士康熙五十六年擢兩江總督踰年

疏言松江府上海縣距海口五十餘里洋船水手良頑不一更有居民漁戶貿易採魚小船往來不絕或偷運米送洋船查上海惟守備一千總一把總一兵二百七十五分防外無幾請將提標右營兵移駐上海其原駐上海之黃浦營改爲水師增大沙船三哨船四巡查海口又言江南濱海要區額設大小船皆巡海必需一日不空缺今營船同時修造恐誤巡防請屆期先修一半仍留一半在汛以俟續修並責成布政使確查不許剋減工料如船不合式及捏報常修冒領工價將承辦各官參處竝下部議行後三年卒於官

本傳

王湖維字七峯嵩縣人康熙三十九年進士五十六年授青浦知縣明於聽斷每坐堂皇決事鬚髯戟張發聲如洪鐘人爲震恐及察其駁詰悉中條理尤惡猾吏稍不當輒刑之以罽毼罷旋起知崑山雍正二年復署青浦縣事囚有錢某者呼冤鞠之知舊令吳宏助分校入聞丞侯三錫賄縱正犯令錢代承其罪改坐之劾丞并究胥吏之同得賊者三錫哀請乞命不爲動也遷太倉知州歷浙江嘉湖分巡道七年奉

命清查江蘇積欠年久數目繁仍莫可究詰湖維分官侵役蝕民欠三項胥役之欺隱者加以重刑盡發其弊他

人莫及

青浦志

與王政鑲黃旗人康熙六十年授金山衛參將軍令嚴肅善體下情時慰勞其父母妻子惟生事擾民則不稍假也先時兵糧類有侵扣王政如數給發無所私陞副將去兵民咸思之

金山志

高其位漢軍鑲黃旗人由筆帖式管佐領襲世職二等輕車都尉歷遷湖廣提督康熙六十年調江南提督

特命署兩江總督奏言松江之泖湖澱湖澄湖港汊叢雜江浙錯壤與太湖毘連計松江所屬通船要口一百十三處釘椿立柵以時啓閉官捐工料百姓樂於趨事將

次告成奏入

賜詩褒美有裨益軍民資偉略劑調文武在和衷之句又
奏進黃浦漁人所網得雙夔龍紐未刻玉印

賞四團龍補服等物尋授文淵閣大學士兼禮部尚書加
太子少傅逾年乞休以原官致仕卒

賜祭葬諡文恪

本傳

周鏞元滿洲正白旗人康熙六十一年擢松江知府愛
民禮士時焦徵君袁熹居浦南鏞元造廬請見雍正元
年

詔舉孝廉方正又欲以焦名應力辭乃已明年夏鹹潮大

入內河禾盡槁鐔元禱於神潮爲退秋颶風驟雨自辰至酉勢轉劇鐔元科頭跣足行泥淖中詣城隍祠未至而風遂息歲旱與城隍共暴烈日中跪禱雨立至尋遷松太分巡道未赴卒

李希舜字慄齋宜良人雍正元年舉人以父病乞近就教諭服闋補上海知縣爲人清介斷獄必誠值凶荒設法蠲賑親臨按視全活者無算濬城河及薛肇二浜鄉鎮支流一律疏洩巡撫陳宏謀深嘉之題陞太倉知州

上海志

俞兆岳字岱楨海寧人以貢選宣平教諭歷知大田臺

灣陞開州知州憂歸雍正元年服除補松江府同知布政使鄂文端爾泰委徵上海舊糧二十五萬石兆岳上書請免浮糧次年怡親王至江南清查錢糧鄂爾泰轉陳於王具疏入告

旨准蠲免蘇州正額銀三十萬松江正額銀十五萬著爲定例又上書鄂爾泰請築石塘會朱文端軾出視海塘兆岳徒步隨行五十里言土塘易潰必易以石軾深然之定議自金山嘴至華家角四十里築塘三千八百五十四丈卽委兆岳董其役四年陞青州知府六年特擢通政參議浙江總督李衛奉

命查勘松江塘工疏言松江議建石塘今已築二千四百九十丈惟陞任同知俞兆岳所築工程獨爲合式請簡發前來總司其事奉

旨依議八年陞太僕卿十年秋颶風海盜惟松江新塘無害其餘均被潮災巡撫喬世臣奏聞請賑而有司辦理不善兆岳遺書世臣

書附見後

切責之十三年陞江西巡撫

晉吏部侍郎以奏免關稅數目不符爲總督慶復劾罷

兆岳請交刑部質訊巡撫邱濬奏無情弊免議旋卒

本傳

遣巡撫喬世臣書

聞被水災民赴臺呈訴者閣下

不論真僞卽予柳責兆岳竊以爲過矣刑罰不得已而用之者也刑罰不中民無所措手足閣下倡之於上府縣效尤於下將可憐可閔之赤子束縛之鞭撻

之治海窮黎死於水死於飢死於官之苛政可為傷
心飢民拾塗乞食日某等非賊非盜被廟陷無家可
歸止求一飽苟延性命其辭哀鴻形鵠面攜老挈幼
其狀慘官驅逐之奔填溝壑未嘗抗命鎖拏遞呈之
人重示枷責俯首受刑未嘗出一不遜之語閣下輒
日刁民以兆岳視之殊不見其刁也蘇松難治不在
民之頑而在吏之奸積蠹侵盜發掘是其故智稽查
惟恐不密今來告吏胥侵漁者閣下怒不准究將告
狀之民一舉枷責吏何所憚民何所申

皇上莫大恩膏徒飽吏胥之腹災民並不能沾實惠

皇上明竝日月無微不勘萬一聞之不知閣下將何以辭
解矣百姓雖愚可以誠感不可以偽欺閣下馬牌傳
示勘塘之後卽便勘災忽以微雨返權回至松江為
幕客諫沮乃復夜至上海一宿而返凡被災之輕重
民閒之疾苦不聞不見實有闕焉能防道路之口邪
皇上宵旰靡寧勤求上理祥雲瑞麥史不勝書獨江蘇有
如此水災繼以蟲傷是必我輩臣工奉職無狀以致
上干天和皆宜痛自刻責思過修省今毫無恐懼警
惕之實心方且張燈演戲日事宴會遇災而不知懼
竊為閣下恥之兆岳聞大臣謀國先公後私民有災

患當以民命爲重身家爲輕古人以天下爲己任一夫不獲時予之辜今災民徧野死亡相繼閣下身爲大吏不竭力設法使之得所而高居簡出雖有粟能食之而安邪閣下之待我厚矣勘塘疏內備承推許閣下以德施兆岳當以德報敢不盡言閣下聽兆岳之說先捐養廉銀爲倡屬員紳士富室自當趨命恐後令各縣徧設粥廠以延民命不過三月麥熟即可停止庶幾轉禍爲福若不設法救賑則正帑有限災民千百萬豈能徧給邪稍有不安失撫綏之道禍必不測圖之不可不早辨之不可不慎伏祈留意

朱軾字可亭江西高安人康熙三十五年進士由庶吉士改知湖北潛江縣行取授刑部主事歷遷通政使浙江巡撫擢左都御史加吏部尚書銜太子太保晉太子太傅兼理吏部尚書雍正二年

上以軾曾任浙江巡撫

命赴浙議海塘事宜竝勘蘇松塘工疏言江南華亭婁上海等縣塘工自金山衛城北至華家角土塘六千二百餘丈內自滌缺墩至東灣九百六十九丈餘緣洋面大小金山積沙潮直衝滌缺塘坍入海自金山墩至西新墩七百六十八丈兵廠至張家舍二百八十八丈倪家路至三盆墩三百六十丈周公墩至華家角千四百六十餘丈皆老岸久坍新塘屢潰請均易土爲石其餘二千四百丈自上海汛頭墩至嘉定等處水勢稍緩土塘足資捍禦應堅築高厚密釘排椿多種雜樹以固塘身計修築石塘土塘統需銀十九萬二千九百兩有奇疏

下部議行尋授文華殿大學士兼吏部兵部尚書署翰林院掌院學士

命在總理處協同辦事

賜騎都尉世職卒

賜祭葬諡文端

高宗純皇帝懷舊詩稱爲可亭朱先生

本傳

欽璉長興人雍正元年進士四年除南匯知縣時縣初設事皆創始璉赫赫有廉能聲攝上海繫豪民之尤者正厥辜復涖南匯築護塘一萬五千三百餘丈潮不爲害著有虛白齋詩鈔又有丁銓者大興人雍正七年以

如臯知縣署上海縣事有膽識鞫訟轆轤立剖璉自以

爲不及云

上海志參
南匯志

周中鉉字子振山陰人起家崇明丞康熙六十一年

詔下所部擇賢才吏勝治劇者大吏以中鉉名上

召見奏對稱

旨授華亭知縣政簡而不弛刑協而不煩民有自殺其伯
誣指甲中鉉訊得實置之法獄以平雍正二年秋會大
淫雨烈風鼓海驟溢巨防盪蹴數百里民飄溺不可勝
數沒敗稻穫縣用彫匱中鉉約束吏毋追求弔恤死疾
力請賑濟多所甦全未幾以歲賦不中常律法當罷縣

人日走聚愬巡撫上其事

許復留四年奉

命擢松江知府松江北距海南仰太湖自古言水利者三江震澤同人海吳松旣久湮損田十八九

上命總督范時繹巡撫陳時夏濬吳松江復三江故道以劉家河工屬中鉉中鉉旣受令計畫規度以勉厥庸而陳家渡地近海洪流悍雄槌薪難施中鉉以爲非置堰其怒不可殺乃偕千總陸章乘船當險築未合而湍沸急覆舟中鉉與章俱歿於水事

聞贈太僕卿

予祭葬蔭一子得錄於國學

石笥山房集
參齊蘇勒傳

張安國秀水人雍正四年以江寧通判署金山縣事時
縣新設庶務未舉安國悉心籌畫以衛城濱海請擇適
中地建倉署於朱涇鎮閱兩月工成民便輸納坐前漕
米霉變論罷

舒慕芬字蘭軒靖安人雍正六年由優貢除知奉賢縣
事縣瀕海多積逋慕芬誠以勸輸不事敲扑而課無缺
額濬青村城濠鹽得流通田資灌漑性至孝母廖迎養
在署一切善政咸稟母教云

奉賢志

文鐸武昌人雍正七年署金山縣事留心學校優禮士

人縣無學宮書院鐸至卽捐俸置義學於朱涇鎮延師督課咸得成就

徐必昌字鳳岡仁和人雍正九年以舉人授奉賢知縣奸胥蠹役咸加懲創退無怨言歲大祲賑救輒盡心力註誤去起攝寶山復以奉賢事罷旅食蕭然安之若素

奉賢志

張純字怙思上元人性至孝五歲喪父哭泣如成人奉母訓刻志讀書爲名諸生三十餘年雍正九年以歲貢授奉賢訓導年已七十听夕饗嬪必設父母位而已侍食焉勤於課士月必再舉遴其文之尤者爲九峯集益

編奉賢志

陳上齡江寧人下沙場大使雍正十年潮災蕩圯課重上齡詳免收則場民德之母林七十生辰白鶴降於庭王道升顏其堂曰來鶴誌慈孝之感

南匯志

汪德馨字香壑夏邑人雍正十一年擢松江知府值稔疹之後政持大體靜鎮不煩民得休養生息他若理鹽辦銅權關凡所兼攝長才肆應沛然有餘乾隆四年蘇州闕守奉

命遴選賢能調任去

唐堂集

王道字直夫福建海澄人歲貢教習期滿雍正十三年

授金山知縣政先化導不事鞭扑後罷僑寓朱涇數載
輦瓢屢空晏如也詩靈妙變化有江湖間吟集黃中允
之雋序之

松江詩鈔
參唐堂集

戴仁行字躍淵濟寧人雍正九年進士十三年由荆溪
調知福泉縣性和而介遇事裁決必親未嘗假手幕僚
胥吏先是雍正三年議析青浦分置福泉所轄田畝瘠
薄而三十一保與上海嘉定接壤民俗刁悍糧抗不輸
仁行廉知其弊一切徵賦按畝額多寡均爲十限先發
畝薄令保甲督催隨其物力之便完及限額而止民無
差擾輸納踊躍乾隆六七兩年奏銷十分全完通省所

未有也十年秩滿督撫特薦將內擢會并縣謝事旋因盜案未獲絀吏議歸不復仕

青浦志

翁藻字荻洲仁和人雍正元年進士乾隆元年擢蘇松太兵備道下車觀風甄拔多知名士刻吳會采風錄復建申江書院延凌少司馬如煥主之親臨考試訓士以讀書立行爲先又別購陸氏宅立啓蒙書院課幼學歷署按察使治獄多平反調江安道去

上海志

許逢元字坦庵益都人乾隆二年知奉賢縣慈惠明敏聽訟情法相麗人稱平允

奉賢志

韓墉字惠中晉江人乾隆三年以舉人除知南匯縣政

尚清嚴而聽訟遇骨肉參商者必以禮法情誼開導之
再任縣事士民悅服

南匯志

楊超曾武陵人康熙五十四年進士由庶吉士授編修
累擢至兵部尚書乾隆五年署兩江總督晉吏部尚書
疏言松江二里涇係黃浦宣洩要道前兩浙鹽臣佟吉
圖恐沙隨潮進淤積鹽河於涇口築壩攔截嗣因民田
蓄洩無備舟楫出入迂迴撫臣張渠請壩攔建牖但建
牖或礙鹽運請開壩後卽於壩基設立木柵中留寬闊
柵門每屆六月十二月掣鹽時依期封閉以防偷漏平
時聽商民往來庶爲兩便又言松江太倉沿海石塘工

計占壓及空廢田不下百餘頃撫臣許容奏請空廢零田令原業戶領種定額輸租臣思此田皆民間恆產並未給還原價若以錢糧既經豁免又必按畝徵租似非情理之平且半作溝潭不成阡陌將來歲修取土正無底止在舊戶亦不能長爲己有請聽耕種免租均如所請議行兼署安徽巡撫

諭令回部辦事丁父憂回籍卒

賜祭葬諡文敏

本傳

王理字勵園奉天人雍正四年舉人乾隆五年知青浦縣年逾六十秉性剛直訟至輒理之不以煩瑣爲嫌使

令擇樸實者三四人一子自隨襄贊幕務卻鹽典餽送
舊規清漕銀浮收積弊在任五載謝事去

青浦志

吳進義寧朔人由行伍累擢江南提督疏言太湖界連
江浙漁船奸良莫辨請照海洋例巡哨與浙撫會商每
營派將備一配駕沙船唬哨船各一帶兵總巡十日更
換將備有事千把總代往其支河小汛不通內河者飭
兩省陸路兵巡查則聲勢聯絡奸宄斂迹得

旨嘉獎調浙江補古北口提督加太子少保卒晉贈太子
太保

賜祭葬諡壯愷

本傳

常琬字婁山長沙人雍正八年進士歷知南陽洧州儀徵乾隆六年調金山知縣分校鄉闈者再律已廉而養民惠縣無志琬聘焦庶常以敬等成書二十卷明於聽斷豪猾皆斂跡縣有母女苦節琬造其廬請旌爲建雙節坊興教化緩賦稅恤刑禮士善政不勝舉在任十二年致仕行囊中惟圖書數事而已

改光宗字昭來順天人雍正己酉武舉庚戌進士由侍衛官松江參將擢壽春總兵官以督緝亂民馬朝柱於英霍山中勞疾卒初官至松江時母卒於任遂葬於松及是遺表籲請入籍華亭得

旨俞允贈都督同知

賜祭葬

華亭志參
松江詩鈔

劉曄澤字茗柯長沙縣人雍正八年進士乾隆元年應博學鴻詞科七年授奉賢知縣廉明慈惠每聽訟藹然數語剖決無不當者雅好文詞兼工八法至今士民得其片紙珍如拱璧著有斯香堂集

王健字燕賞單縣人乾隆十年以保舉除上海知縣十二年水災請帑賑恤復出私資掩埋殘骸明年雨雹傷禾借俸買米倡先平糶申江書院亦健創建尋以公過去任

上海志

張繼曾字衣吉霍山人舉人以孝廉方正徵不樂就縣令改合肥訓導乾隆十三年遷華亭教諭其律已廉待物溫視諸生不啻親子弟見則與之講學行論詩文諄諄詳勉工詩七律尤勝八法直追黃庭經著有懷岳堂

詩集

學福齋集

潘涵錢塘人乾隆十三年以蘇州通判署南匯縣事不三月清歷年未結之案鹽賈有以賄嘗者卻勿受去官日縣民焚香送境外

南匯志

申夢璽字受昌陽曲人乾隆十五年由蘇州知府擢蘇松太兵備道和平簡肅顏天理國法人情六字於堂振

興書院尤留心水利以薛家浜爲東南要道捐廉疏濬

建石閘資蓄洩焉

上海志

王宗閔字瑞占山陰人乾隆十七年以金山丞署縣事縣西南北三面皆泖與平湖連壤兩地民爭水利構訟江浙大吏檄道府會勘平湖民豪橫甚宗閔戒縣民無忿爭上其事於大府卒判歸金山邑人聚攻冒籍依勢者以阻考控府且獲罪宗閔白之府釋之一時士民竝受其福

龐作棟江西人乾隆十二年舉人授金山知縣綜覈名實不濫不苛其於錢糧出納尤能潔己奉公制府尹文

端繼善條陳漕政有倣照龐令收漕之語

陳焱字晉亭塾屋人乾隆十七年以蘇州糧捕同知署南匯縣事獎善懲惡捐俸掩骼有婦謀殺其夫駕誣讎家焱廉得其實置之法遠近稱快

南匯志

周隆謙天津人乾隆十六年進士除青浦知縣首建義塾加惠童蒙民有剝悍不馴者諭以理無不洗心革面徵收漕米無勾合贏躬親較視吏胥不得緣以爲奸在任三年謳歌載道調繁吳縣百姓如失慈父母焉

許治字宵野雲夢人乾隆四年進士二十二年由崑山調知華亭縣自奉儉約徵收漕白無絲毫沾潤嘗濟南

北俞塘濯錦港橫涇田資灌溉民甚德之子兆椿字秋巖乾隆三十七年進士五十九年由刑部郎中出知松

江府歷遷至刑部右侍郎

湖海詩傳

劉伯燠任邱人乾隆二十三年由進士授奉賢知縣持法公平政尚體要奉賢自雍正四年析縣以來未立學宮至是伯燠首議創興捐俸爲紳士倡殿廡崇煥士林得所瞻仰遷蘇州府同知歷署松江府篆

劉霖甘肅中衛人乾隆四年進士二十三年署金山縣事縣初分設孤貧附居郡郭舊院按季支給糧銀至是霖請於大府捐資別建養濟院於倉署西偏俾無失所

其慈惠類如此

李兆鉉字曉庵鍾祥人乾隆二十四年由舉人除南匯知縣持躬勤儉審斷練達縣素多訟師傾軋百出兆鉉訪得其人盡法懲之案牘頓清

南匯志

劉若洙字魯源漢軍鑲黃旗人乾隆二十五年知南匯縣事縣多盜窩若洙至日夜微行擒捕未半載盜遠遁游民亦各歸業去任有接收舊令徵存緩漕米六千石鼠耗十一新令邀之來民囊粟出迎呼劉青天應補漕米六百石不日而足

南匯志

宋楚望當陽人進士乾隆二十六年擢松江知府下車

設鐵櫃於堂受民詞微行鄉鎮召集耆老詢問疾苦開誠布公懸示勸諭府童試向例進署置買桌檯楚望令移試院至今便之後有朱覲光四川人副貢四十九年由太倉知州署松江府事嚴明剛決匪徒衙蠹匿跡銷聲至有越境苟免者後擢江寧知府以去

趙天秘字仙枝上元人乾隆八年舉人二十六年選青浦教諭動止端方不苟言笑曾有富人生日餽百金冀其一至天秘堅卻不往其廉潔類如此著有南北集楊宏聲柏鄉人乾隆十六年進士二十六年授金山知縣金山爲婁分縣文廟未建春秋丁祭合祀華亭宏聲

至捐廉相土飭材庀工紳民感悅輸將日集不請帑而
事辦

李毓英蔚州人上海三林司巡檢能屏絕一切陋規乾隆二十七年奉檄覈查飢戶保甲進供具毓英曰我官雖小歲荒民困忍以此累民乎嚴卻之

南匯志

褚啓宗字亮儕合肥人乾隆二十五年進士二十七年授青浦知縣時吳松江久淤水漲田淹巡撫莊有恭委員會勘議濬核定工費按畝均攤先奏請借帑於兩稅內分年繳納

旨可派上海青浦嘉定三縣各任其地青浦應濬二百三

十餘丈啓宗按稅九兩出夫一人給直赴工又度江勢迂曲則水流不暢易於壅塞從繕灣抵許家村計地四里取直勢疏爲新河又建千秋橋以便往來至今利之縣城年久殘缺三十二年奉

命興修布政使令啓宗核估工料崑山知縣李景龍助理自南門而東至北門水關景龍督之南門而西至北門啓宗督之埽埴悉新工作堅密以憂歸卒

青浦志

楊宜崙字恒山直隸靈壽人乾隆二十九年知南匯縣去而復來者再秉性嚴峻鉤捕積窩逸賊悉置諸法修文廟繕書院構文星閣士風丕變宜崙之力居多

南匯志

吳昌宗字文園吳縣人乾隆三十一年以舉人授南匯訓導性坦夷諸生執贄見者不以厚薄爲親疏質以藝隨材引導之齋厨蕭然吟嘯自若著有燕山吟草

南匯志

孫含中字西林昌邑人乾隆二十六年進士三十八年以部郎出爲松太兵備道事無巨細皆出親裁官吏奉法惟謹所司關樞絲毫不苟商民便之擢浙江布政使禱雨行烈日中觸熱卒

上海志

史尚確字易齋樂陵人乾隆二十一年舉人三十八年除上海知縣外和內介夤緣悉絕課士崇尚實學五載遷蘇州海防同知

上海志

張履觀雲南建水人乾隆二十七年解元四十年授婁縣知縣爲政清肅縣有兄弟爭產兄自恃身列仕宦不以弟爲意履觀卒直其弟而紬其兄又有宦家奴追租不具呈僅持主名刺投縣履觀責奴而縱佃奴銜之愬於其主後履觀辦鉛至滇省某宦適巡撫其地劾罷之人以前嫌不予某官

白雲上河內人乾隆十六年武進士四十年由揚州遊擊擢金山營參將整飭營伍能得士卒心好文作擘窠字亦有法嘗捐俸濬城內支河數百丈軍民交便後陞副將去

劉大年吳縣人乾隆二十七年舉人四十年授金山訓導品高學茂造士有方

韓運鴻字葯齋天長人乾隆九年舉人四十三年署上海縣事實心愛民囊空如洗而於貧士猶分俸周之檄署蘇州同知百姓遮留不得會運鴻有建閘方浜之請重來督濬書楹帖於河干公廨敢曰愛民六月淹留勞汗血漫云勤事一錢不受勵冰心後補南匯知縣三年

告歸

上海志

孫思庭字坦園懷來人乾隆二十七年舉人四十三年知上海縣性剛方廉潔下車用法嚴峻盜賊屏跡有故

人子來謁款接殷勤及緣事卒不稍貸遷太倉知州終

福建鹽法道

上海志參
南匯志

王學廉仁和人乾隆二十八年進士四十五年以儀徵
知縣署上海縣事聽訟公平風裁甚峻廉俸外絲毫不
以入己人比之玉壺冰云

上海志

謝庭薰字自南貴陽人乾隆十八年舉人四十七年選
知婁縣在官三載宅心仁厚延陸大理錫熊譔錄縣志
三十卷復謀之紳士朱履吉創興書院規模粗具知府
楊壽楠欲擴而大之爰飭所屬合資公建雲間書院府
爲典領而捐廉置買官房購書籍經營伊始庭薰之功

爲多

林蕃鍾字煜奇號螽蟴長洲人乾隆三十二年舉人四十八年選婁縣教諭翹然負異其爲文善自修飭不染塵垢而尤喜臨仿晉唐碑帖以能書名歲末周卒於官所著師法一編閨範一編詩詞二卷

二林居集

王希伊字耕伯寶應人乾隆六年舉人除陝西白水知縣有善政四十八年改授青浦教諭啓迪諸生詞嚴義正諸生始畏之終敬之祀孫烈愍榮父子陳忠裕子龍於忠義祠又刻忠裕年譜訪其墓於皇甫林清出傍墓田如干畝詳立忠裕外舅孫王氏子爲後俾資祭掃總

督書麟嘗從希伊學至是行部過青浦來謁希伊書上
報君恩下守庭訓采擊壤歌扶太平運十六言贈之未
幾病歸卒

青浦詩傳
參行述

楊壽楠字培山清江人乾隆三十四年進士由庶吉士
授編修歷給事中四十九年出知松江府風度端凝撫
循周至下車修學宮規復禮器及倡修明學士方忠文
孝孺祠婁縣知縣謝庭薰創建書院壽楠以書院育材
之地飲食教誨二者相輔而行今一縣出財有限後日
膏火不繼非所以圖久遠也乃飭所屬稽檔冊出公項
之在官者以佐經用闔郡聞風樂輸踵至又指示形勝

改建堂舍咸備延震澤吳侍讀舒帷主之振興鼓舞文風士習駸駸日上調知蘇州兩署松太道遷陝西延榆綏兵備道

陳鳳苞字桐山石埭人乾隆五十年以舉人選婁縣教諭長於舉業月必集諸生於課經堂論文角藝定爲優劣諸生經其指授者無不掇科第以去嘗舉杯屬客歎曰以陳桐山之才而不能成進士諸君心能平乎再試禮部數奇不偶卒於官

王勸字蠡臺麻城人乾隆五十三年以舉人授金山知縣五年調知華亭在金山旌表李方二貞女時以粟米

周之及來華亭以張澤橋跨澱涇洪濤震蕩水陸交病捐廉重建行者稱便遷泰州知州卒

寧貴字鞠溪漢軍鑲白旗人乾隆三十三年舉人五十四年授知婁縣春秋上丁率諸生習禮明倫堂省牲滌濯必誠必敬道有遺金拾得者候其復來還之而遺金者轉以數闕爭鬩不已貴召至前曰爾金三十此二十非爾金也候緝給薄責拾者與之曰爾非拾彼金毋還可也一時服其能謫斷以迴避遷涇縣終亳州知州

胡志熊字公望孝感人乾隆三十五年舉人五十六年知南匯縣事有民婦竊盜橫行鄉里旁縣監生某屬郡

書某陰爲之地志熊請於府杖革擬徙如律捐修縣志
闢發幽光詳明水利閱者稱善俗尙淺葬志熊倡設義
冢掩埋至七萬餘棺以卓薦擢廣州府同知未行署柘
林通判檄赴沐陽卒於官著有名言輯要行於世

康基田字仲耕興縣人乾隆二十三年進士除新陽縣
累遷至江南河道總督嘉慶五年左遷太倉知州攝松
江府事重濬劉河及七鴉浦以雲間書院舊建谷陽門
外城市囂塵遷於學宮北掄材運璧官無費財民不知
役未數月蒞事又別建景賢書院分課童生凡坊巷石
闕其名久湮者親爲署額頓復舊觀擢廣東布政使調

江西江寧以督催鉛運遲延鐫級補戶部郎中加知府銜發往河南歷加道銜太僕少卿銜致仕十八年重赴鹿鳴宴

恩賞三品卿銜

周有聲字希甫長沙人乾隆三十五年舉人授內閣中書六十年成進士留中書任俸滿以記名同知揀發貴州軍營辦事擢大定知府署貴西道以失察小錢墜吏議捐復原官兩江總督百請發江南籌辦李家樓搶護險工嘉慶十七年蘇撫朱檄調清查松江倉庫謝絕一切供應稽查檔冊分款詳報旋署松江府事清理

積案分絲剝繭人服其公明又延郡士輯修府志甫設
局調署蘇州復辦賑徐州總理下河以勞致疾卒於工

松江府志卷